



REPUBLIKA E SHQIPËRISË

KOMISIONI I PAVARUR I KUALIFIKIMIT

Nr. 459 Akti

Nr. 594 Vendimi  
Tiranë, më 6.12.2022

V E N D I M

Trupi gjykues i Komisionit të Pavarur të Kualifikimit, i përbërë nga:

<b>Valbona Sanxhaktari</b>	Kryesuese
<b>Olsi Komici</b>	Relator
<b>Xhensila Pine</b>	Anëtare

asistuar gjatë procesit të vendimmarrjes nga sekretarja gjyqësore, znj. Resilda Bilaj, në prani edhe të vëzhgueses ndërkombëtare, znj. Elka Ermenkova, në datën 5.12.2022 mori në shqyrtim, mbi bazë dokumentesh, çështjen që i përket subjektit të rivlerësimit:

**SUBJEKTI I RIVLERËSIMIT:** **Znj. Ida Ahmetlli**, me detyrë prokurore në Prokurorinë pranë Gjykatës së Rrethit Gjyqësor Tiranë.

**BAZA LIGJORE:** **Neni 179/b** i Kushtetutës së Republikës së Shqipërisë;  
**Neni G** i Aneksit të Kushtetutës së Republikës së Shqipërisë;  
**Ligji nr. 84/2016**, “Për rivlerësimin kalimtar të gjyqtarëve dhe prokurorëve në Republikën e Shqipërisë”;  
**Ligji nr. 96/2016**, “Për statusin e gjyqtarëve dhe prokurorëve në Republikën e Shqipërisë”;  
**Ligji nr. 44/2015**, “Kodi i Procedurave Administrative i Republikës së Shqipërisë”;  
**Vendimi nr. 78, datë 12.12.2017**, i Gjykatës Kushtetuese.

**I. RRETHANAT E ÇËSHTJES**

1. Subjekti i rivlerësimit Ida Ahmetlli, gjatë periudhës së rivlerësimit kalimtar, ka ushtruar detyrën e prokurorit në Prokurorinë pranë Gjykatës së Rrethit Gjyqësor Tiranë. Në zbatim të pikës 3 të nenit 179/b të Kushtetutës ky subjekt i është nënshtruar procesit të rivlerësimit *ex officio*.
2. Subjekti i rivlerësimit Ida Ahmetlli është shortuar me shortin e datës 16.12.2019, në përputhje me rregulloren e zhvillimit të shortit në Komisionin e Pavarur të Kualifikimit (në

vijim Komisioni). Nga procedura e shortit rezultoi se procesi i rivlerësimit do të kryhet nga trupi gjykues i përbërë nga komisionerët Xhensila Pine, Valbona Sanxhaktari dhe Olsi Komici, i cili u zgjodh relator i çështjes.

**3.** Menjëherë pas hedhjes së shortit, bazuar në nenet 33, 39 dhe 43 të ligjit nr. 84/2016, “Për rivlerësimin kalimtar të gjyqtarëve dhe prokurorëve në Republikën e Shqipërisë”, u administrua raporti i hartuar nga: Inspektorati i Lartë i Deklarimit dhe Kontrollit të Pasurive dhe Konfliktit të Interesave (në vijim ILDKPKI); Drejtoria e Sigurimit të Informacionit të Klasifikuar (në vijim DSIK); dhe Grupi i Punës në Këshillin e Lartë të Prokurorisë (në vijim KLP).

**4.** Trupi gjykues i shortuar pranë Komisionit vendosi fillimin e hetimit administrativ të thelluar dhe të gjithanshëm, sipas nenit 45 të ligjit nr. 84/2016, me qëllim vlerësimin e të gjitha fakteve dhe rrethanave të nevojshme për procedurën e rivlerësimit, si dhe të caktojë kryesuese të trupit gjykues komisioneren Valbona Sanxhaktari. Të gjithë anëtarët deklaruan mosqenien në kushtet e konfliktit të interesit.

**5.** Komisioni në datën 9.1.2020, nëpërmjet postës elektronike, njoftoi subjektin e rivlerësimit mbi fillimin e procesit të rivlerësimit kalimtar, përbërjen e trupit gjykues dhe iu kërkua të shprehej nëse ishte në kushtet e konfliktit të interesit me anëtarët e tij.

**6.** Subjekti i rivlerësimit, me anë të postës elektronike, në datën 29.1.2020 deklaroi se nuk është në kushtet e konfliktit të interesit me ndonjë nga anëtarët e trupit gjykues.

**7.** Trupi gjykues, në prani edhe të vëzhgueses ndërkombëtare, me vendimin e datës 20.10.2022, vendosi të mbyllë hetimin kryesisht për subjektin e rivlerësimit Ida Ahmetlli për të tria kriteret dhe në datën 24.10.2022 e njoftoi për rezultatet e hetimit dhe të drejtën për t’u njohur me dokumentacionin e dosjes, kthimin e përgjigjeve dhe depozitim të provave brenda datës 7.11.2022.

**8.** Subjekti i rivlerësimit, në datën 4.11.2022, në rrugë elektronike, ka njoftuar Komisionin se në datën 3.11.2022 i është drejtuar KLP-së me kërkesë për mbarimin e statusit të magjistratit dhe të detyrës së saj si prokurore. Subjekti i rivlerësimit i kërkoi Komisionit që në mbështetje të pikës 1 të nenit G të Aneksit të Kushtetutës të përfundojë procesin e rivlerësimit për shkak të dorëheqjes. Gjithashtu njofton Komisionin se heq dorë nga e drejta për të marrë pjesë në seancën dëgjimore.

**9.** Komisioni, në kuadër të një procesi të rregullt ligjor, në respektim të së drejtës së subjektit për t’u dëgjuar bazuar në nenin 55 të ligjit nr. 84/2016, me anë të postës elektronike, në datën 1.12.2022 ka njoftuar subjektin të shprehë vullnetin nëse dëshiron ose jo të marrë pjesë në seancë dëgjimore, fokusi i së cilës do të jetë përfundimi i procesit të rivlerësimit në zbatim të nenit G të Aneksit të Kushtetutës.

**10.** Subjekti i rivlerësimit, me anë të postës elektronike, në datën 2.12.2022 ka njoftuar Komisionin se heq dorë nga e drejta për të marrë pjesë në seancën dëgjimore dhe kërkon gjithashtu që të mos zhvillohet një seancë e tillë, duke i qëndruar kërkesës së saj drejtuar Komisionit në datën 4.11.2022.

11. KLP-ja, me shkresën e datës 14.11.2022<sup>1</sup>, ka dërguar pranë Komisionit, bashkëngjitur, vendimin nr. \*\*\*, datë 10.11.2022, për deklarimin e mbarimit të statusit të magjistratit për znj. Ida Ahmetli, për shkak të dorëheqjes.

12. Me vendimin nr. \*\*\*, datë 10.11.2022, KLP-ja ka vendosur:

a) *Deklarimin e mbarimit të statusit të magjistratit për shkak dorëheqje për znj. Ida Ahmetli, me detyrë prokurore në Prokurorinë pranë Gjykatës së Shkallës së Parë Tiranë.*

b) *Dorëheqja jep efekt në datën 31.12.2022.*

c) *Të njoftohen për këtë vendim znj. Ida Ahmetli, Prokurori i Përgjithshëm, Prokuroria pranë Gjykatës së Shkallës së Parë Tiranë dhe Komisioni i Pavarur i Kualifikimit.*

d) *Ky vendim hyn në fuqi menjëherë dhe publikohet në faqen zyrtare të Këshillit.*

13. Komisioni, me shkresën e datës 25.11.2022<sup>2</sup>, ka kërkuar informacion nga Gjykata Administrative e Apelit nëse ndaj vendimi nr. \*\*\*, datë 10.11.2022, të KLP-së është bërë ankim nga subjekti i rivlerësimit Ida Ahmetli.

14. Gjykata e Administrative e Apelit, me shkresën e datës 1.12.2022<sup>3</sup>, ka konfirmuar se deri në datën 30.11.2022 nuk është bërë ankim ndaj vendimit nr. \*\*\*, datë 10.11.2022, të KLP-së nga subjekti i rivlerësimit Ida Ahmetli.

## **II. ARSYET PËR PËRFUNDIMIN E PROCESIT TË RIVLERËSIMIT**

15. Procesi i rivlerësimit ndaj subjektit të rivlerësimit Ida Ahmetli ka filluar në respektim të pikës 3 të nenit 179/b të Kushtetutës së Republikës së Shqipërisë dhe të pikës 4 të nenit 4 të ligjit nr. 84/2016, “Për rivlerësimin kalimtar të gjyqtarëve dhe prokurorëve në Republikën e Shqipërisë”.

16. Trupi gjykues i Komisionit të Pavarur të Kualifikimit, pasi u njoh me rrethanat e çështjes, bazuar në provat e administruara më lart, konstaton se:

i) Subjekti i rivlerësimit ka ushtruar funksionin e prokurorit në Prokurorinë pranë Gjykatës së Rrethit Gjyqësor Tiranë.

ii) Procesi i rivlerësimit ndaj saj nuk ka përfunduar me vendim sipas pikës 1 të nenit 58 dhe me një nga masat disiplinore respektive sipas nenit 59 “konfirmimi në detyrë”, të nenit 60 “pezullimi nga detyra dhe detyrimi për të ndjekur programin e trajnimit” dhe të nenit 61 “shkarkimi nga detyra”.

iii) Subjekti i rivlerësimit Ida Ahmetli ka ushtruar të drejtën për të dhënë dorëheqjen.

iv) Subjekti i rivlerësimit ka paraqitur dorëheqjen pranë KLP-së dhe kjo e fundit, me vendimin nr. \*\*\*, datë 10.11.2022, ka vendosur deklarimin e mbarimit të statusit të magjistratit Ida Ahmetli për shkak të dorëheqjes.

<sup>1</sup> Shkresë nr. \*\*\* prot., datë 14.11.2022, e KLP-së, “Dërgohet vendimi nr. \*\*\* i KLP-së, i datës 10.11.2022”.

<sup>2</sup> Shkresë nr. \*\*\* prot., datë 25.11.2022, e Komisionit.

<sup>3</sup> Shkresë nr. \*\*\* prot., datë 1.12.2022, e Gjykatës Administrative të Apelit.

17. Neni 65 i ligjit nr. 96/2016, “Për statusin e gjyqtarëve dhe prokurorëve në Republikën e Shqipërisë”, ka parashikuar procedurën që duhet ndjekur për mbarimin e statusit të magjistratit nëpërmjet dorëheqjes<sup>4</sup>.

18. Neni G i Aneksit të Kushtetutës së Republikës së Shqipërisë ka parashikuar mundësinë e subjektit të rivlerësimit për të dhënë dorëheqjen, si vijon: *“1. Subjekti i rivlerësimit mund të japë dorëheqjen nga detyra dhe në këtë rast procesi i rivlerësimit ndërpritet. 2. Subjekti i rivlerësimit që dorëhiqet sipas kësaj dispozite nuk mund të emërohet gjyqtar ose prokuror i çdo niveli, anëtar i Këshillit të Lartë Gjyqësor ose i Këshillit të Lartë të Prokurorisë, Inspektor i Lartë i Drejtësisë ose Prokuror i Përgjithshëm për një periudhë 15-vjeçare”*.

19. Vendimi nr. 78, datë 12.12.2017, i Gjykatës Kushtetuese, paragrafi 43, ndër të tjera, ka interpretuar lidhjen ndërmjet këtyre dy dispozitave, si vijon: *“[...] Neni 56 i ligjit i jep mundësinë subjektit që dorëhiqet brenda afatit 3-mujor, të përfitojë pagesë kalimtare sipas parashikimeve ligjore në fuqi, mundësi të cilën nuk e përfitojnë subjektet që e japin dorëheqjen pas përfundimit të këtij afati. Gjykata thekson se, për sa kohë që subjekti i rivlerësimit është në detyrë dhe procesi i rivlerësimit nuk ka përfunduar ende, ai ka të drejtën të japë dorëheqjen dhe në këtë rast procesi i rivlerësimit ndërpritet, duke u zbatuar parashikimet e nenit G të Aneksit të Kushtetutës [...]”*.

20. Për zhvillimin e një procesi të rregullt ligjor dhe respektimin e të drejtës së subjektit të rivlerësimit për t’u dëgjuar, bazuar në nenin 55 të ligjit nr. 84/2016, Komisioni mban parasysh vullnetin e subjektit, e cila, me komunikimin elektronik të datës 2.12.2022 me Komisionin, shprehu vullnetin e saj për të mos marrë pjesë në seancën dëgjimore.

21. Në këto kushte, trupi gjykues çmon se subjekti i rivlerësimit ka shfrytëzuar të drejtën që i njeh Kushtetuta dhe ligji për dorëheqje nga statusi i magjistratit. Ndërprerja e procesit të rivlerësimit për shkak të dorëheqjes së subjektit të rivlerësimit sjell si pasojë përfundimin e kësaj procedure administrative dhe, si rrjedhojë, subjekti i rivlerësimit humbet të drejtën për t’u emëruar gjyqtar ose prokuror i çdo niveli, anëtar i Këshillit të Lartë Gjyqësor ose i Këshillit të Lartë të Prokurorisë, Inspektor i Lartë i Drejtësisë ose Prokuror i Përgjithshëm për një periudhë 15-vjeçare, sipas parashikimeve të pikës 2 të nenit G të Aneksit të Kushtetutës<sup>5</sup>.

## **PËR KËTO ARSYE,**

Trupi gjykues i Komisionit të Pavarur të Kualifikimit, mbështetur në nenin G të Aneksit të Kushtetutës së Republikës së Shqipërisë, nenin 57 të ligjit nr. 84/2016, “Për rivlerësimin kalimtar të gjyqtarëve dhe prokurorëve në Republikën e Shqipërisë”, si dhe në nenin 64 të ligjit nr. 96/2016, “Për statusin e gjyqtarëve dhe prokurorëve në Republikën e Shqipërisë”.

<sup>4</sup> 1. Magjistrati mund të kërkojë mbarimin e statusit nëpërmjet paraqitjes së dorëheqjes para Këshillit përkatës. 2. Dorëheqja duhet të jetë me shkrim dhe nuk është e nevojshme të jetë e arsyetuar. Dorëheqja jep efektet në fund të muajit pasardhës, nga dita kur Këshilli merr deklarinimin me shkrim të dorëheqjes. Mbarimi i statusit të magjistratit deklarohet me vendim të Këshillit jo më vonë se dy javë nga mbarimi i statusit.

<sup>5</sup> Komisioni, në aplikimin e parashikimeve të pikave 1 dhe 2 të nenit G të Aneksit të Kushtetutës, mban parasysh edhe praktikën e konsoliduar tashmë të Kolegjit të Posaçëm të Apelimit referuar vendimeve nr. 17/2021 (JR), datë 6.7.2021, për subjektin G. L. dhe nr. 36/2021 (JR), datë 24.11.2021, për subjektin A. G., etj.

## **V E N D O S I:**

1. Të deklarojë ndërprerjen e procesit të rivlerësimit kalimtar për subjektin e rivlerësimit Ida Ahmetlli.
2. Ndalimin e emërimit të znj. Ida Ahmetlli si gjyqtar ose prokuror i çdo niveli, anëtar i Këshillit të Lartë Gjyqësor ose Këshillit të Lartë të Prokurorisë, Inspektor i Lartë i Drejtësisë ose Prokuror i Përgjithshëm për një periudhë 15-vjeçare.
3. Ky vendim u njoftohet subjektit të rivlerësimit, Komisionerit Publik dhe vëzhguesve ndërkombëtarë, si dhe publikohet në faqen zyrtare të Komisionit, në përputhje me pikën 7 të nenit 55 të ligjit nr. 84/2016.
4. Kundër këtij vendimi lejohet ankim në Kolegjin e Posaçëm të Apelit brenda 15 ditëve nga data e njoftimit të tij dhe duhet të dorëzohet në Komisionin e Pavarur të Kualifikimit.  
Ky vendim u shpall në datën 6.12.2022.

## **ANËTARËT E TRUPIT GJYKUES**

**Valbona SANXHAKTARI**  
**Kryesuese**

**Xhensila PINE**  
**Anëtare**

**Olsi KOMICI**  
**Relator**

*Sekretare gjyqësore*  
*Resilda Bilaj*